

GENEALOGIE

ou


L'EXTRACTION, ET VIE DE

IVLLE MAZARIN
Cardinal & Ministre
d'Etat en France.

A P A R I S,

chez la coppie Imprimé

A E N V E R S.



GENEALOGIE

OV L'EXTRACTION ET VIE DE

IVLLE MAZARIN.

A present Cardinal & Ministre d'estat en France.

LA premiere chose que ie demande de toy (amy Lecteur) est la Louïange que tu dois à Dieu, de ce que tu peus lire en France, ce qui s'ensuit, & sçauoir comme si tu auois esté sur les lieux de la Naissance de la personne de laquelle ie pretends te faire voir icy vn abregé.

Pierre mazarin estoit natif de Scicille, lequel estoit Marchand, & apres auoir negocié quelque temps, soit qu'il aye esté ruyné par les iniures du temps, ou autrement, il fut contrainct de faire banquerouste de sommes immances, & pour la furrete du reste de son bien, prit la fuitte & se refugia à Rome, avec sa famille, de laquelle il auoit deux fils, dont l'un estoit Archeuesque d'aix, & a present Cardinal de saincte Cicille, & l'autre Iulle mazarin, non encore en aucune charge.

Cetuy Iulle mazarin commençant à devenir en aage competant, semit à seruire en la maison de messieurs les Colonneze dans la Ville de rome

&

& apres en celle de Sachetty, avec l'argent de
quels non de petites sommes, pour luy euegard
à sa condition, par diverses voyes & particulie-
rement par celle du Ieu: devint grandement pecu-
nieux. L'affection que messieurs de Sachetty luy
portoient luy causerent le commencement de sa
fortune, car l'ayant mis en bonne estime aupres
du Cardinal Antonio Barbarin, il le prit en sa
Cour, lequel pour monstrier l'affection qu'il por-
roit à la maison de Sachetty, il l'auroit fait mettre
en dignité & Prelature, sollicitant de tout son
pouvoir le Pape Urbain 8. lors seant en la Chaire
sainct Pierre, de l'envoier pour Nonce aupres de
Charles Emanuel Duc de Souoye, ce que sa Sain-
cteté octroya à Antonio.

Mais auparavant cette legation, pour accor-
der les differends qui estoient entre l'empereur,
le Roy d'Espagne, & le Duc de mantoue, & faire
partir les François de Casal, il passa au mont Fer-
rat où il negocia, & par son intelligence secrette
fit sortir les François par une porte, & entre par
une autre: ayant premierement fait partir les Es-
pagnols & Allemans hors de mantoüe, laissant les
François dans Casal; mettant par ce moyen la
confiance & l'honneur d'Urbain en conpromis,
trompant frauduleusement, non seulement le
Roy d'Espagne, mais encore l'empereur, d'où

A ij s'en

s'en sont ensuivies les sanglantes guerres & Batailles de l'Estat de Millan, Flandres & Allemagne.

Par le moyen de cette negotiation, il se mit dans la bien ueillance du Roy tres-Chrestien, puis entra en affection avec le Cardinal de Richelieu, lequel croiant l'esprit de Iulle, propre aux desseins quil avoit pour le bien de la Couronne, auroit demandé à sa saincteté le Chapeau de Cardinal, pour Iulle mazarin, desirant le remmunerer & gratifier de la trahison par luy faite au Roy d'Espagne, duquel il estoit vassal.

Sa saincteté sçachant le procedé de Iulle, refusa le Chapeau de Cardinal, disant que s'il plaisoit à sa majesté nommer quelqu'un de ses sujets ou autre personne, qu'il luy accorderoit volontiers, mais non pas pour Iulle mazarin : Neantmoins sa majesté pria de rechef sa saincteté avec grande instance il prit cette affaire si à cœur que le Pape fut contrainct de lui accorder, le fit appeller au Cardinalat : & pour ne point faire tort au Roy Catholique & ne voulant estre en mauvaïse grace avec luy, auquel il auoit refusé la mesme chose pour Contalco, il lui accorda pareillement, & fut aussi appellé au Cardinalat, & en exclus le sieur Visconty, auquel il l'auoit auparauant refusé, luy ayant esté demandée par la Couronne de Pologne.

Tout

Tout cecy a succédé la mort du Cardinal de Richelieu , apres laquelle il a commandé en sa place, ayant esté iceluy Mazarin, par luy recommandé à sa Majesté , elle le fit son Conseiller d'Estat, dont il y en eut qui conçurent grande haine cōtre luy , Ce Cardinal est devenu si riche & si opulant qu'il s'estime avoir plus d'or & d'argent qu'aucun seigneur de l'Europe: il a acheté le fameux Palais du deffunct Cardinal Bentiuoglio, scitué au monté Cauallo, pendant la vie du deffunct Pape Urbain, il a demandé plusieurs fois permission à sa Maieité , de retourner à Rome pour prendre le Chapeau de Cardinal, ce qu'il ne peut obtenir.

La mort de sa maieité estant survenueë, il a regy avec grande autorité, & fust déclaré l'un des executeur de son testament, & pour dire uray il a pretendu assuietir les Princes du sang Royal à ses commandemens , & pour ce subiet , il a supposé que l'on avoit voulu attenter à sa personne , Monsieur de Beaufort a le premier senty les coups de son indignation , quoy qu'innocent fut enfermé au bois de Vincenne par sa sollicitation , mais ç'a esté un stratageme duquel il s'est servy , pour voir si la Reyne pourviroit à la seurété de sa personne & l'on luy bailleroit des gardes, ce quiluy a succédé, car ladite Dame Rey-

B ne

ne pour l'affection quelle luy porte, la fait changer en son Palais, afin qu'estant gardé comme le Roy, elle empescheroit qu'il ne fust offensé.

Ce Cardinal est celuy qui dès long-temps a recherché à traverser dans le Conclave la felicité, & ternir la gloire du Cardinal Panphilio, & c'est encore luy qui aujourd'huy cherche seditieusement à intimider le Pape par la uoye & force des armes à se desister de la Iustice qu'il a droit de faire contre les Barbarins.

Il aura le iuste & tres-digne chastiment de sa faute.

Dans ce temps arriua à Rome monsieur de Senneterre, qui portoit la figure du roy pour la presenter à la sainte Chapelle de Lorette, & par iceluy Iulle mazarin enuoya grande quantité de richesses en intention de s'en retourner en Italie crainte de quelque mauvais succez contre sa personne.

Dans ce mesme temps il courut vn bruit à Rome qui dura assez long-temps, concernant quantité de grande remises de deniers que ledit mazarin faisoit faire pour luy, ce qui est tout certain ayant amassé de grands thresors, mais il n'a rien avancé, car pendant que le Pape Innocent dixiesme uivra, il se teint pour asseuré comme article de Foy, que Iulle mazarin n'entrera iamais
dans

dans rome, estant d'Innocent mal affectionné & ennemy d'iceluy.

Lemesme Mazarin cause le mal que souffre le Roy Catholique en ses Estats, & pour cet effet ill'a déclaré non seulement à luy, mais à tous ses parens traistres & rebelles à sadite Maiesté dans tous ses Estats.

Au temps que Iulle mazarin suiuiot la milice, il estoit grandement vitieux, grand ioüeur & dissolu, & en plusieurs occasions & rencontres il a receu, non de petites, mais de grandes blessures, & notamment pour le differend des femmes, mais a present l'on dit qu'il est plus modeste & qu'il tient sa grauité, & s'attache fort aux bons benefices de France, ne visant pas à la despence pour regaler ceux qui bon luy semble, scachant qu'il n'y va rien du sien. Comme il a fait aux Barbarins, lesquels il a deffendus, mais le Pape connoissant bien que ce n'est pas le Roy qui les a protegez & que c'est Iulle mazarin, sous l'Auctorité d'iceluy, ne se desiste nullement de l'adversion qu'il a conceu contre luy, en fin ie veux dire les parolles que dit saint Paul,

Omnes insulani Mali, sicule autem pessimi.

En la Cour de rome il y est en tres mauuaise estime pour les seditions que son esprit turbulent y a esmeues contre la Chrestienté il n'est guere

bon amy des Fiorenzela a cause de certains interests particuliers & desgousts passez interuenus en consideration du pere mazarin son frere cy-deuant nommé en la religion Dominiquaine du temps qu'il estoit maistre du sacré Palais, & encore lors qu'il fut fait general dudit Ordre.

Tusçait, amy lecteur, qu'il a empesché la conclusion d'une Paix generale, pour les desseins qu'il a de d'espouiller le royaume de toutes ses finances, se les appropriant; au lieu de les employer aux affaires de la Guerre, pour lesquelles elles sont destinées: & lors que cet Auguste Senat a voulu prendre cognoissance de tant de millions qui se sont leuez en France, depuis la mort du feu roy, à par ses pernicieux Conseils, conseillé la reyne d'attenter, sur les Illustres Personnes de ce fameux Parlement qui a causé la reuolution de de Paris, ce qui a failly de perdre Monsieur le Chancelier, & mesme le Grand maistre de l'Artillerie de France & beaucoup d'autres Seigneurs, mais Dieu nous ayant preserué iusques a present, prions le qu'il nous maintienne à tousiours.